

17 AUG 2000

SITI HASMAH ZIARAH JENAZAH ANAK SAUDARA

ALOR SETAR, 17 Ogos (Bernama) -- Datin Seri Dr Siti Hasmah Mohamed Ali, isteri Perdana Menteri Datuk Seri Dr Mahathir Mohamad, hari ini menghadiri pengkebumian seorang anak saudara yang meninggal dunia akibat kemalangan jalan raya.

Roslan Abdul Ghani, 44, anak kepada kakak Dr Mahathir, Habsah, meninggal dunia pada 11.40 malam tadi di Hospital Alor Setar akibat kemalangan jalan raya berdekatan rumahnya semasa beliau pulang dari bandar Alor Setar.

Habsah Mohamad, 84, menetap di Taman Malik, Jalan Pegawai di sini.

Sejurus tiba di Lapangan Terbang Sultan Abdul Halim, Kepala Batas, pukul 10 pagi, Siti Hasmah terus ke tanah perkuburan di Masjid Akar Peluru, Jalan Pegawai, di mana jenazah Roslan dikebumikan.

Menurut Timbalan Ketua Trafik (Pentadbiran) Kota Setar Cif Insp Noh Idris, kemalangan berlaku pada 8.15 malam apabila Roslan yang menunggang motosikal cuba mengelak sebuah kereta di depannya, lalu membelok ke kiri tetapi terlanggar sebuah basikal.

Akibat pelanggaran itu, dia terjatuh serta mengalami kecederaan parah di kepala.

-- BERNAMA

MNH MAI